

INISIATIF KEBAJIKAN ANGGOTA ATM DIPERLUAS

10 April 2016

- The Borneo Post Online
Oleh Steve Annuar



SIMBOLIK: Hishammuddin melakukan simbolik perasmian E-MASS disaksikan oleh Johari (depan kiri) dan tetamu kehormat lain semasa Karnival Usahawan Veteran peringkat kebangsaan di Dewan Suarah semalam.

Lebih banyak bantuan bakal diumumkan, bukti keprihatinan kerajaan: Hishammuddin

MIRI: Keprihatinan terhadap kebajikan anggota dan veteran Angkatan Tentera Malaysia (ATM) terus diperluas merangkumi kebajikan keluarga terdekat seperti balu dan anak veteran.

Menteri Pertahanan Malaysia Datuk Seri Hishammuddin Tun Hussein berkata, lebih banyak lagi inisiatif bakal diumumkan dan kejayaan pelaksanaannya bergantung kepada sokongan anggota ATM.

“Ini merupakan usaha berterusan dan ia bukan perkara mudah memandangkan ekonomi dunia dan negara tidak menentu,” katanya.

Beliau berkata demikian kepada media selepas merasmikan Karnival Usahawan Veteran peringkat kebangsaan di Dewan Suarah semalam.

Hishammuddin menjelaskan, kerajaan akan cari jalan untuk memastikan apa yang dijanji akan ditunai.

“Bantuan seperti bantuan bencana alam, bantuan sara hidup dan bantuan kelayakan ke universiti awam dikembang, ditambah baik dan dipelbagaikan,” katanya.

Kebajikan anggota dan veteran ATM merupakan satu daripada lima teras dalam program Halatuju MINDEF 2016 melibatkan kerjasama ATM bagi menetapkan hala tuju dan pelan strategik Kementerian pada tahun ini yang turut mengambilkira perancangan dalam RMK-11.

Ia adalah satu daripada lima teras yang diperkenalkan manakala empat teras lain ialah Kesiapsiagaan Aset ATM, Keselamatan Negara, Diplomasi Pertahanan, dan Transformasi PLKN.

Beliau berkata kerjasama antara Persatuan Veteran ATM, Jabatan Hal Ehwal Veteran (JHEV) dan Perbadanan Hal Ehwal Bekas Angkatan Tentera (PERHEBAT) diperlukan dalam melaksanakan program menjaga kebajikan ahli.

Jelasnya, beliau berharap kerjasama itu akan diterjemah kepada satu gelombang sokongan tidak berbelah bahagi, menolak politik perpecahan, menolak politik kebencian dan menyokong usaha bukan sahaja atas kertas sebaliknya membuktikan agenda sejak merdeka dapat diteruskan.

Bagaimanapun, beliau percaya ada pihak akan menidakkan kesungguhan kerajaan dan menjadikan ia sebagai isu dalam kempen semasa Pilihan Raya Negeri (PRN) di Sarawak.

Beliau memberitahu, sokongan pihak industri termasuk institusi pengajian tinggi kepada PERHEBAT merupakan satu perkembangan positif dan dapat diterima baik oleh veteran tentera.

Terdahulu, Hishammuddin menyempurnakan majlis pengurniaan Pingat Jasa Malaysia (PJM) kepada 60 askar veteran sebagai penghargaan kerajaan bagi mengenang jasa dan pengorbanan veteran yang menegak keamanan dan kedaulatan negara.

Beliau turut melancarkan inisiatif E-Mass (Electronic Medical Automation Supply System) iaitu medium perantara bagi anggota veteran ATM layak untuk mendapat bekalan dan peralatan perubatan daripada pembekal yang berdaftar.

Inisiatif ini tidak melibatkan sebarang bayaran dan warga pesara tidak perlu membuat tuntutan semula bayaran perubatan daripada JHEV.

Setakat ini sebanyak 700 farmasi sudah berdaftar dengan sistem E-MASS yang mana 54 daripadanya terletak di Sarawak.

Selain itu, Hishammuddin juga menyaksikan pertukaran Perjanjian Persefahaman (MoU) antara PERHEBAT bersama tujuh rakan strategik iaitu Universiti Malaysia Sarawak (UNIMAS), Yayasan PENERAJU, Sime Darby Plantation, Destini Berhad, Defence Technology Sdn Bhd (DEFTECH), Weststar Group dan Zetro Services Sdn Bhd.

MoU itu bertujuan sebagai tawaran penempatan pekerjaan dan penempatan latihan sambil kerja untuk bakal pesara.

Hadir sama ialah Timbalan Menteri Pertahanan Malaysia, Dato' Wira Mohd Johari Baharum, Panglima Angkatan Tentera Malaysia, Jeneral Tan Sri Dato' Sri (Dr) Zulkifeli Mohd Zin, Ketua

Setiausaha Kementerian Pertahanan Malaysia, Dato Sri Abdul Rahim Mohamad Radzi, Panglima Tentera Darat Jeneral Tan Sri Raja Mohamed Affandi Raja Mohamed Noor, Presiden Persatuan Veteran ATM, Senator Laksamana Tan Sri Mohd Anwar Mohd Nor, Menteri Muda Sukan, Datuk Lee Kim Shin dan Datuk Bandar, Lawrence Lai.